

畏有亂乎。今以詎王爲嗣。天皇臥病之日。詔田村皇子曰。天下大任。本非輒言。爾田村皇子○。慎以察之。不可緩。次詔山背大兄王曰。汝獨莫諠譁。必從群言。慎以勿違。則是天皇遺言焉。今誰爲天皇。時群臣嘿之無答。亦問之非答。強且問之。於是大伴鯨連進曰。旣從天皇遺命耳。更不可待群言。阿倍臣則問曰。何謂也。開其意。對曰。天皇曷思歟。詔田村皇子曰。天下大任也。不可緩。因此而言。皇位旣定。誰人異言。時采女臣摩禮志。高向臣宇摩。中臣連彌氣。難波吉士身刺四臣曰。隨大伴連言。更無異。許勢臣大麻呂。佐伯連東人。紀臣鹽手三人進曰。山背大兄王是宜爲天皇。唯蘇我倉麻呂臣獨曰。臣也。當時不得便言。更思之後。啓爰大臣知群臣不和。而不能成事退之。先是大臣獨問境部摩理勢臣曰。今天皇崩無嗣。誰爲天皇。對曰。舉山背大兄爲天皇。是時山背大兄居於斑鳩宮。漏聆是議。即遣三國王。櫻井臣和慈古二人。密謂大臣曰。傳聞之。叔父以田村皇子欲爲天皇。我聞此言。立思矣。居思矣。未得其理。願分明欲知叔父之意。於是大臣得山背大兄之告。而不能獨對。則喚阿倍臣。中臣連。紀臣。河邊臣。高向臣。采女臣。大伴連。許勢臣等。仍曲舉山背大兄之語。旣而便且謂大夫等曰。汝大夫等共詣於斑鳩宮。當啓山背大兄王曰。賤臣何之獨輒定嗣位。唯舉天皇之遺詔以告于群臣。群臣並言。如遺言。田村皇子。自當嗣位。更詎異言。是群卿言也。特非臣心。但雖有臣私意。而惶之。不得傳啓。乃面日親啓焉。爰群大夫等受大臣之言。共詣于斑鳩宮。使三國王。櫻井臣。以大臣之辭。啓於山背大兄王。時大兄王使傳問群大夫等曰。天皇遺詔奈何。對曰。臣等不知其深。唯得大臣語狀。稱天皇臥病之日。詔田村皇子曰。非輕輒言。來國政。是以爾田村皇子慎以言之。不可緩。次詔大兄王曰。汝肝雅而勿諠言。必宜從群言。是乃近侍諸女王及采女等悉知之。且大王所察。於是大兄王且令問之曰。是遺詔也。專誰人聆焉。答曰。臣等不知其密。旣而更亦令告群大夫等曰。愛之叔父勞思。非一介之使。遣重臣等而教覺。是大恩也。然今群卿所道。天皇遺命者。小。小違我之所聆。吾聞天皇臥病。而馳上之。侍于門下。時中臣連彌氣。自禁省出之曰。天皇命以喚之。則參進向于閣門。亦栗隈采女。黑女。迎於庭中。引入大殿。於是近習者栗下女王爲首。女孺。鮪女等八人。并數十